

## الشكارة

اتفق الجحش والحصيني والحمامة إنهم يتشاركوا في أشكارة، يعني يزرعولهم شقفة أرض قمح ولا شعير مشان يوكلوها لمن تفرك ولا تستوي. راحوا على شقفة هالأرض، زلّوها وحرثوها وبذروها مع بعضهم البعض. وتعاهدوا ما حدا يوكل منها إلا لما تستوي وييجوا عليها مع بعضهم البعض.

وصاروا كل يومين، ثلاثة يروحوا يشقوا على هالشكارة. أشتت الدنيا. وطلع القمح، وصار يكبر، ما يوم مثل يوم. وهمه مبسوطين وفرحانين لهاقمحات. بقوا يعشّبوهن ويديروا بالهم عليهن.

يوم من الأيام، بعد ما أفركن، يعني صرن فريكة، راحوا مثل عادتهم تيشقوا عليهن، لقين القمحات مرعيّات، حدا أكلهن. سألوا بعض: إنت أكلتهن يا احصيني؟ قال: لأ، أنا ما إجيتش إلا معكم. سألوا الحمامة: إنت أكلتيهن يا حمامة؟ قالت: لأ، أنا ما إجيتش إلا معكم. سألوا الجحش: إنت أكلتهن يا جحش؟ قال: لأ، أنا ما إجيتش إلا معكم.

قالوا: مالناش إلا كل واحد فينا يحلف يمين على إلبحيرة. قالوا ياالله على لبحيرة. راحوا على البحيرة. قدّم الحصيني على طرف البحيرة وحلف:

وحقك يا هالبحيرة ما أكلت منك يا هالشكيرة  
وبعد ما حلف نطّ على الشقة الثانية من لبحيرة، ونفد.

قدّمت الحمامة على طرف البحيرة، وحلّفت:

وحقك يا هالبحيرة ما أكلت منك يا هالشكيرة  
نطّت الحمامة إلا هي على الشقة الثانية، ونفدت.

ظلّ الجحش، قدّم على طرف البحيرة، وقال: هاق ... هاق

وحقك يا هالبحيرة ما أكلت منك يا هالشكيرة

أجا تايّنط عالشقة الثانية مثلهم، وقع في البحيرة، لأنه هو اللي خان، أكل القمحات، وكذب على رفايقه فغرق في البحيرة.